



册府元龜

卷之二百九十三

至九十六



1	3
849	
97	



冊 849
97



冊府元龜

淮南李嗣京參閱

西極文翔鳳訂正

豫章黃國琦較釋

宗室部

薦賢 儉約 抑損 好尚

薦賢

夫樂善好賢或藩之令範也繇東京以來宗哲繼武
乃能察椽屬之才矣詢士類之行義隱淪胥洎仄陋
咸達或形慰薦之疏或應舉知之詔或白之於清宴

冊府元龜

宗室部

卷之三百九十三

或升之於有司莫不任官縻爵飛聲騰實上以增多士彬彬之盛下以隆公族振振之德又何况知人之爲哲薦賢之爲賢者哉

漢東平王蒼上疏薦吳良曰臣聞爲國所重必在得人報恩之義莫大薦士竊見臣府西曹掾齊國吳良資質敦固公方庶恪躬儉安貧白首一節又治尚書學通師法經任博士行中表儀宜備宿衛以輔聖政臣蒼榮寵絕矣憂責深大私慕公叔同升之義懼于臧文竊位之罪敢乘愚瞽犯冒嚴禁顯宗以示公卿口前以事見良鬚髮皓然衣冠甚偉夫薦賢助國宰

相之職蕭何舉韓信設壇而拜不復考試今以良爲議郎蒼又上書表薦名士左馮翊桓虞虛已禮下與參政事

晉成都王穎表論興義功臣盧志和演董洪王彥超驥等五人皆封開國公侯

宋臨川王義慶出爲荊州刺史元嘉十二年普使內外群官舉士義慶上表曰詔書疇咨羣司延及連牧求賢仄陋拔善幽遐伏惟陛下惠哲光宣經緯明遠皇階藻曜風猷具昇而猶詢衢室之令典遵明臺之獻訓降流慮於管庫紆聖恩於板築故以道邈往載

德高前王臣敢竭虛閣祇承明旨伏見前臨淄令新野庾實秉直履約愛敬淳深昔在母憂毀瘠過禮今罹火疚泣每有聞行成閨庭孝著隣黨足以敦化率民齊教執俗前徵奉朝請武陵龔祈恬和平昔貞潔純素潛居研志耽情墳籍亦足鎮息頽競獎勗浮動處士南郡師覺授才學明敏操介清脩業均井渫志固冰霜臣往年辟爲州祭酒未抒其慮若朝命遠暨玉帛遐臻異人間出何遠之有

江夏王義恭元嘉九年帝詔百官舉才義恭上表曰臣聞雲和備樂則繁會克諧驛興駉服則致遠斯効陛下順夤大化文明在躬玉衡旣正泰階載一而猶發慮英髦垂情仄陋幽眷空同顯著揚歷是以潛虬聳鱗佇利見之期翔鳳弭翼應來儀之感竊見南陽宗炳操履閑遠思業貞純砥節丘園息賓盛世貧約而苦內無改情軒冕屢招確爾不拔若以蒲帛之聘感以大倫之美庶投竿釋褐翻然來儀必能毗燮九官宣贊百揆尚書金部郎臣徐森之臣府中直兵參軍事臣王天寶並局力允濟忠盡款誠往年逆臣叛逆華陽夫守森之全境寧民績章危棘前者經略伊瀍元戎喪旅天寶北勤河朔東據營兵勲勇旣昭心

事兼竭雖經褒叙未盡才且並可授以邊藩展其志
力交征遠邈累喪藩將政刑每闕撫蒞惟艱南中曼
遠風謠迥隔蠻僚狡竊邊氓荼毒寔湏練寔以綏其
艱謂森之可交州刺史天寶可寧州刺史庶足威懷
荒表肅清遐服昔魏庾之賢切存薦士趙武之明事
彰管庫臣識愧前良理謝先哲率舉所知仰酬採訪
退懼瞽言無足甄獎

長沙王義欣上言所統威遠將軍北譙梁二郡大守
關中侯中季曆自奉職邦畿于茲五年信惠並宣威
化兼著外清暴亂內輯民黎役賦均平閭井齊肅綏

穆初附招攜荒遠郊境之外仰澤懷風爵賞之授績
能是顯且陞階秩以崇獎勸進弼寧朔將軍

南齊竟陵王子良武帝子武帝詔舉士子良薦王思
遠及吳郡顧暲之陳郡殷敷

始安王遙光爲揚州刺史明帝建武初有詔舉士遙
光表薦王暕王僧儒曰臣聞求賢暫勞垂拱求遠方
之疏壤取類導川伏惟陛下道隱旒纁信克符璽白
駒空谷振鷺在庭猶懼隱鱗卜祝藏罨屠保物色關
下委裘河上非取制於一狐諒求味於蕪采而五聲
倦響九工是詢寢議廟堂借聽輿皂臣位任隆重義

兼家邦實欲名實不違微倖路絕勢門上品猶當格
以清談英俊下察不可限以位貌竊見秘書丞琅琊
王暕年二十七業重光海內冠冕神清氣茂允迪中
和叔寶理遺之談彥輔名教之樂故以暉暉先達領
袖後進居無塵雜家有賜書辭賦清新屬言玄達室
邇人曠物踈道親養素丘園台階虛位庠序公朝萬
夫傾望豈徒荀令可想李公不亡而已哉前晉安郡
侯官令東海王僧儒年三十五理尚棲約思致怡敏
旣筆耕爲養亦傭書成學乃炤營映雪編蒲緝柳先
言往行人物雅俗甘泉遺儀南宮故事畫地成圖抵

掌可述豈直鼯鼠有必對之辨竹書無落簡之謬陳
坐鎮雅俗引益已多僧儒訪對不休質疑斯在並東
序之秘寶瑚璉之茂器誠言以人廢而才實世資帝
乃以暕爲騎從事中郎僧儒爲尚書儀曹郎曲江公
遙欣與始安王遙光等參預政事凡所談薦皆得其
人繇是朝野輻湊軒蓋盈門

後魏高陽王雍宣武正始中詔百官各舉所知雍以
田曹參軍卒辛少雍爲舉首遷給事中侍郎

清河王懌舉李平行臺士兵郎楊固除部兵校尉領
汝南王悅郎中令尋加寧遠將軍時悅年少行多不

法胥近小人固上疏切諫并面陳往代諸王賢愚之分以感動悅悅甚敬憚之憚大悅以爲舉得其人臨淮王或爲僕射表薦涿郡人祖鴻勳有文學宜試以一官勅除奉朝請人謂之曰臨淮舉卿便以得調竟不相謝恐非其義鴻勳曰爲國舉才臨淮之務祖鴻勳何事從而謝之或聞而喜曰吾得其人矣

彭城王勰宣武初爲司徒成淹爲羽林監領主客知左右二都水事勰口先帝奉本有成旨淹有歸國之誠兼歷官署稱宜加優陟高祖頽命詔猶在耳乃相聞選曹加淹右軍領左右都水仍主客令復授驍騎

將軍加輔國將軍都水主客如故勰又每稱尚書祠部郎宋世景精幹尚書僕射才也汝南王悅宣武時詔四門博士董徽教授徵自安州刺史入爲司農少卿光祿大夫徵出州入卿匪唯學業所致亦繇悅以其師資之義爲啓請焉

任城王澄臨薨啓諫議大夫張普惠爲尚書右丞靈太后旣深悼覽啓從之北齊任城王潛爲定州刺史嘗語李德林云竊聞蔽賢蒙顯戮久令君沉滯吾獨得潤身朝廷縱不見尤亦惧明靈所譴於是舉秀才李德林者文章學識固

不得言觀其風神器宇終爲棟梁之用至於經國大體是賈生晁錯之儔彫虫小枝殆相如子雲之輩今雖唐虞君世俊又盈朝然脩大廈者豈厭夫良材之積也吾嘗見孔文舉薦禰衡表云洪水橫流帝思俾乂以正平比夫大禹常謂擬宇宙非倫今以德林言之便覺前言非大

後唐雍王重美爲河南尹時馬裔孫爲禮部侍郎翰林學士清泰中藩邸舊臣韓昭裔房暉爲樞使劉延朗李專美爲宣徽使河南尹雍王重美不平之密奏曰馬裔孫者只令視草恐未得宜帝然之故令掌貢

舉尋拜中書侍郎平章事

儉約

傳曰儉德之恭書曰祿不期侈皆先儒之不訓方策之深戒也乃有體自玄極列於戚藩承慶靈之錫羨處富貴之極勢而能躬履素行志脩庶節循守法度靡尚華麗居官以清白處躬以簡儉去泰室慾慎終如始斯固秉上智之質爲宗室之範者焉

後漢東海恭王彊光武子也彊深執儉謙及薨帝不欲厚葬以違其意詔曰王恭謙好禮以德自終遣送之物務從約省衣足斂形茅車瓦器物減於制以彰

王卓爾獨行之志

東海項王肅疆之子也性謙儉循恭王法度

魏陳思王植武帝子也性簡易不治威儀輿馬服飾

不尚華麗植之薨也遺令薄葬

中山恭王衮武帝子也黃初七年徙封濮陽太守和

二年就國尚約儉教勅妃妾紡績織紵習為家人之

事

晉高密文獻王泰宣帝弟也泰武帝時錄尚書事性

庶靜不近聲色雖為宰輔食大國之服飭肴膳如布

衣寒士

譙王承宣帝孫也元帝大興初為輔國將軍領左軍

將軍居官儉約家無別室及為相州刺史湘土荒殘

公私困弊承躬自儉約乘蓐菱車而傾心綏撫甚有

能名

宋臨川烈武王道規高祖少弟也道規無子以長沙

景王第二子義慶為嗣義慶性謙虛素寡嗜慾受任

歷藩無浮滯之過為荊州刺史始至及去鎮迎送物

竝不受

衡陽王義季武帝子也為荊州刺史先是臨川王義

慶在任巴蜀亂擾師旅應接府庫空虛義季躬行節

儉蓄財省用數年間還復充實徵爲都督南徐兗青冀幽六州諸軍事南兗州刺史登舟之日帷帳器服諸隨刺史者悉畱之荊州以爲美談

建平王景素文帝孫也性甚儉素爲荊州時州有高齊刻楹柏構景素竟不處朝廷頗賜以甲第辭而不當兩官所遺珍玩塵於笥篋食嘗不過一肉器用瓦素時有獻鏤玉器景素頌主簿何昌寓曰我持安所用哉乃謝而反之

南齊始興王鑑高帝子也爲益州刺史於州園地得古冢無復棺但有古柳銅器十餘種并古形玉璧三枚珍寶甚多不可皆識金銀爲蚕蛇形者數十計又以朱沙爲阜水銀爲沼左右咸勸取鑑曰皇太子昔在雍有發古冢者得玉鏡玉屏風玉匣之屬皆將還都吾意嘗不同乃遣功曹何仲爲之起墳諸寶物一不得犯性甚清在蜀積年未嘗有所盈造資用一歲不滿三萬王儉嘗歎云始興王雖尊貴而行履都是素士

梁鄱陽王恢大祖子也時有進筒中者恢以奇貨異服卽命焚之

南康簡王績高祖子也寡玩好少嗜慾居無僕妾躬

事約儉所有租稅悉寄天府及薨後府有南康國無名錢數千萬

長沙王懿子藻爲益州刺史初鄧元起之在蜀也崇於聚斂財貨山積金玉珍帛爲一室名爲內藏綺縠錦羅爲一室號曰外府藻以外府賜將帥內藏歸王府不有私焉及還朝輕裝就路

始興王憺子暉嘗乘折角牛靸木屐被服比於儒者名盛海內爲宗室推重

後魏任城王曇景稷子也廉謹自脩及薨令薄葬

廣陵王衍景稷孫也衍性清慎所在廉潔又不營產

業亡日無歛屍具

京兆王魯孫琮爲太尉錄尚書事性清儉不營產業身化之日家無餘財

彭城王勰獻文子也清正儉素門無私謁

北齊彭城景思王浹高祖子也自定州刺史徵爲侍中人吏送別悲踰有老翁數百人相率具饌曰自殿下至來五載人不識吏吏不欺人百姓有識已來始逢令化殿下唯飲此鄉水未食有姓食聊獻疏薄攸重其意爲食一口

蘭陵王長恭一名孝瓘文襄第四子也芒山之捷武

成賞其功命賈護爲買妾二十人惟受其一有千金青券臨死日盡燔之

後周代曩王達文帝子也雅好節儉食無兼膳侍姬不過數人皆衣綈衣又不營資產國無儲積左右嘗以爲言達從容應之曰君子憂道不憂貧何須如此隋蔡王智積高祖弟愨之子也初爲開府時延侍讀府佐於座所設唯餅果酒終三酌家有妓女唯年節嘉慶奏於太妃之前其簡如此

唐鄭王元懿曾孫也勉爲太子太師率性素淡清廉簡易爲宗臣之表二字績的皆蕪介有節

穎王璩玄宗第十三子也爲蜀郡大都督璩性儉率將渡綿州江登舟見以綵緣蓆爲籍者顧曰此可以爲寢處柰何踐之命撤去之

嗣吳王囁建中貞元間爲道虔滁等州刺史入拜宗正卿歷官清白居處衣服不免風雨寒暑及卒家無升儲公卿以下率斂以購凶

晉韓王暉爲曹州防禦使蕪愛恤下不營財利不好妓樂部人安之

抑損

古者建國之制名山大澤不以封周室列爵惟五分

土為三使上下相維其疆易制也漢興之初海內甫定鑒妣周夾輔之效徵亡秦孤立之失而子弟寡少並建不足大封同姓以鎮天下或夸州兼郡連城數下然而矯枉之道亦云過矣是以有莫大之患逆辭之萌小者驕佚越法大者倔強放命觸罪絕國勢使之然故賈誼之論晁錯之議主父之策咸以救一時之弊自是之後寢以微弱當塗而下或以疏遠降其爵或以法制損其勢而強弱之道始終可究得失之理於是存焉

漢高祖時諸侯皆賦

國所出有皆入于王也

得自除內史以下

漢獨為置丞相黃金印諸侯自除御史廷尉正博士擬於天子自吳楚反後五宗三世漢為置二千石去丞相曰相銀印諸侯獨得食租稅奪之適其後諸侯貧者或乘牛車也

武帝時主父偃說帝曰古者諸侯地不過百里疆弱之形易制今諸侯或連城數十地方千里緩則驕奢易為滯亂急則助其疆而合從以逆京師今以法制割削則逆節萌起萌謂事之所生如草木之萌芽也前日晁錯是也今諸侯子弟或十數而適嗣代立餘雖骨肉無尺地之封則仁孝之道不宣願陛下令諸侯得推恩分子

弟以地侯之彼人人喜得所願上以德施實分其國必稍自銷弱矣於是帝從其計令諸侯以私恩自裂地分其子弟而漢為定制封疆輒別屬漢郡漢有厚恩而諸侯地稍自分析弱初文帝未賈生之議分齊楚帝施三父之策下推恩之令使諸侯王得分戶邑以封子弟不行黜陟而藩國自析自比以來齊為七謂齊城陽濟北濟南淄川膠西膠東也趙分為六謂趙平原真定中山廣川河間也梁分為五謂梁濟川濟東山陽濟陰也淮南分為三謂淮南衡山廬江皇子始立者大國不過十餘城長沙燕代雖有舊名皆亡南北邊矣長沙之南更置郡燕代以比更置緣邊郡其所有饒利兵馬器械二國皆失之也景帝連七國之變抑損諸侯滅黜其官謂改丞相曰相省御史大夫廷尉少府宗正博士損大夫謁者諸官長丞宜等也武有衡山淮南之謀作左官之律人道上古今會天子而任諸侯故謂之左官也左官猶言左道也

皆僻左不正也漢時依上古法朝政之列以右為尊故謂降秩為左遷仕諸侯為官也諸侯惟得衣食稅租不與政事

衡山王賜所為不法有司請逮治武帝不許為置吏

二百石以上漢儀注吏四百石已下自除國中令以王之惡天下皆為置

後漢光武建武十三年二月詔曰長沙王興真定王

得河間王邵中山王茂皆襲爵為王不應經義以其表屬

既疏不當襲爵為王其以興為臨湘侯臨湘縣今潭州長沙縣得為真定

侯邵為樂成侯樂成縣故城今在羸州樂府縣北茂為單父侯今宋州縣

其宗室及絕國封侯者凡一百三十七人丁巳降趙

王良為趙公太原王章為齊公魯王興為魯公一云建武

十五年大將軍朱佑朝京師奏古者人呂受封不加王爵可改諸侯為公帝即施行

魏文帝黃初五年詔曰先王建國隨時而制漢祖增秦所置郡至光武以天下損耗并省郡縣以今比之益不及焉其改封侯王皆為縣王時法制待藩國既峻迫寮屬皆價豎不才兵人給其殘老大數不過二百人

陳思王植初封東阿王時大發士息及諸國士植以近前諸國士息已見發其遺孤稚弱在者無幾而復被取乃上書曰臣聞古者聖君與日月齊其明四時等其信是以戮凶無重賞善無輕怒若驚寔喜若時

雨恩不中絕教無二可以此臨朝則臣下知所死矣受任在萬里之外審主之所以受官必已之所以授命雖有構會之徒泊然不以為懼者蓋君臣相信之明效也昔章子為齊將人有告之反者威王曰不然左右曰王何以明之王曰聞章子葬改死毋彼尚不欺死父顧當叛生君乎此君之信臣也昔管仲親射桓公後幽囚從魯檻車載使少年挽而送齊管仲知桓公之必用已懼魯之悔謂少年曰吾為汝唱汝為和聲和聲宜走於是管仲唱之少年走而和之日行數百里宿昔而至至則齊相此臣之信君也臣初授

封策書曰植受茲青社封于東土以屏翰皇家爲魏藩輔而所得兵百五十人皆年在耳順或不踰矩虎責官騎及親事凡二百餘人正復不老皆使年壯備有不虞檢校乘城頽不足以自救况皆復耄耄罷洩乎而名爲魏東藩使屏翰王室臣竊自羞矣就之諸國國有士子合不過五百人伏以爲三軍盜損不復賴此外方不定必當須辨者臣願將部曲倍道奔赴夫妻負襁子弟懷糧蹈鋒履刃以徇國難何但習小業兒哉愚誠以揮涕增河懸鼠飲海於朝萬無損益於臣家計甚有廢損又臣士息前後三送無人已竭

惟尚有小兒七八歲已上十六七已還三十餘人今部曲皆年耆卧在床蓆非糜不食眼不能視氣息裁屬凡三十七人疲瘵風靡疣盲聾聵者二十三人惟正湏此小兒大者可備宿衛雖不足以禦寇粗可以警小盜小者不堪大使爲可使耘耰草驅護烏雀休候人則一事廢一日亂則衆業散不親自經營則功不攝常自躬親不委下吏而已陛下聖仁恩許三至士子給國長不復發明詔之下有若皎日保金石之恩必明神之信畫然自固如天如地定習業者並復見送晻若晝晦悵然失圖伏以爲陛下旣爵臣百

察之右居藩國之任爲置鄉士屋名爲宮冢名爲陵
不使其危居獨立無異於凡庶若栢或欣於野畊子
仲樂於灌園蓬戶茅牖原憲之宅也陋巷簞瓢顏子
之居也臣才不見效常用慨然執斯志焉若陛下聽
臣悉還却曲罷官屬省監官使解璽釋綬追伯成子
仲之業營顏淵原憲之事居子臧之廬宅延陵之室
如此雖進無成功退有可守身死之日猶松喬也然
伏度國朝終未嘗聽臣之若是固當羈絆於世繩維
繫於祿位懷屑屑之小憂執無已之百念安得蕩然
肆志逍遙於宇宙之外此願未從陛下必欲崇親親

骨肉潤白骨而榮枯木者惟遂仁德以副前恩詔皆
遂還之

宋孝武以南郡王義宣亂逆繇於強盛欲削王侯江
夏王義恭希旨請省錄尚書上從之又與驃騎大將
軍竟陵王誕奏陳貶損之格九條中外詳議於是有
司奏九條之格猶有未盡更加附益凡二十四條大
抵廳事不得南何施坐帳國官正冬不得跣登國殿
公主妃傳令不得朱服輿不得搗鄣扇不得雉尾劍
不得鹿盧形塑眊不得孔雀白氍毹夾轂隊不得絳襖
平但乘馬不得過二疋胡伎不得綵衣舞伎正冬著

桂衣不得裝面諸妃子不得着緹帶信幡非臺省官
 悉用絳郡縣內史相及封內長官於其封君罷官則
 不復追敬不稱臣諸鎮嘗行車前不得過六隊刀不
 得銀銅飾諸王女封縣主諸王子孫襲封王之妃及
 封侯者夫人並行不得鹵簿諸王子繼體為王者婚
 葬吉鹵悉依諸國公侯之禮不得同皇弟皇子車頭
 作露平形不得擬象龍舟詔可

後魏孝文太和六年春正月乙丑制諸遠屬非太祖
 子孫及異姓為王皆降為公公為侯侯為伯子男仍
 舊皆除將軍之號

唐高祖受禪以天下未定廣封宗室以威天下皇從
 弟及姪年始孩童者數十人皆封為郡王太宗即位
 因舉宗正屬籍問侍臣曰遍封宗子於天下便乎尚
 書右僕射封德彞對曰歷觀往古封王者今最為多
 而漢已降唯封帝子及親兄弟若宗室疏遠者非有
 大功如周之郇滕漢之賈澤並不得濫封所以別親
 疎也先朝敦睦九族一切封王爵命既降多給力役
 蓋以天下為私殊非至公馭物之道太宗曰朕理天
 下本為百姓非欲勞百姓以養已之親也於是宗室
 率以屬疏降為郡公唯有功者數十人封王

後唐末帝清泰元年皇子河南尹重美表前壽安令
賈譚添民戶希別授官中書門下奏親王無薦士例
帝曰有例亦不可况無例乎

好尚

禮曰天命之謂性語曰性相近也習相遠也則知性
有智愚習有善惡乃有荷茅土服膳之寄居藩屏夾
輔之尊純懿內融清明外發冲虛自守味老氏之玄
言空寂為心洞金仙之妙理嗜偏伍之向背窮韜略
之幽微或求訪圖書或繕完器玩搜竒採異適意忘
勞雖趨向不同同歸於善乃流濕就燥之義豈好冊

非素之僻也

漢陽城侯德少脩黃老術嘗持老子知足之計

廣川王去景帝孫也其殿門有成慶畫短衣大袴長

劍成慶荆軻也衛又謂之慶卿燕人謂之荆卿又成慶古之勇士事見淮南子去好之作

七尺五寸劍被服皆効焉

後漢楚王喜黃老學浮屠齋戒祭祀

宋臨川王義慶受任歷藩無浮淫之過唯晚節奉養

沙門頗致費損

南齊竟陵王子良為會稽太守郡閣下有虞翻舊床
罷任還乃致以歸後於西邸起古齋多聚古人器服

以克之子良好釋氏敬信尤篤數於邸園營齋戒大
集朝臣衆僧至賦食行水或躬親其事又招致名僧
講語佛法造經唄新聲道俗之盛江左未有也
衡陽王鈞居身清率言未及時會稽孔珪家起園列
植桐柳多構山泉殆窮精趣鈞徃遊之珪曰殿下處
朱門遊紫闥詎得山人交邪答曰身處朱門而情遊
江海形入紫闥而意在青雲珪大笑之吳郡張融清
折絕俗雖王公貴人視之傲如也唯雅重鈞謂從兄
緒曰衡陽王飄飄有凌雲氣其風雲素韻彌足可懷
融與之遊不知老之將至見賞如此

梁南平王偉文帝子齊世清溪宮改爲芳林苑天監
初賜偉爲第偉又加穿築果木珍竒窮極雕靡有伴
造化立遊客省寒暑得宜冬有籠爐夏設飲扇每與
賓客遊其中命從事中郎蕭子範爲之記梁藩邸之
盛無過焉偉晚年崇信佛理尤精玄學著二旨義別
爲新通又制情性幾神等論義僧罷及周捨陰鈞陸
倕並名精解而不能屈
長沙嗣王業性敦篤所在留惠深信因果篤誠佛法
高祖每嘉歎之

後魏京兆王愉崇信佛道用度嘗至不接

京兆王太興嘗遇患請諸沙門行道所有資財一時
 布施乞求病愈名口散生齋及齋後僧皆四散有一
 沙門言云乞齋餘食太興戲之曰齋食既盡唯有酒
 肉沙門曰亦能食之因出酒一斗羊脚一隻食盡猶
 言不飽及辭出後酒肉俱在出門追之無所見太興
 遂佛前乞願向者之師當非俗人若此病得差即捨
 王爵入道未幾便愈遂請為沙門表十餘乃見許時
 孝文南討左軍詔皇太子於四月八日為之下髮施
 帛二千疋既為沙門更名僧慧居嵩山
 後周長樂侯浚年數歲便累石為營折草作旌旗布

置行伍皆有軍陣之勢及長好讀兵書

隋秦王俊仁恕慈愛崇敬佛道請為沙門不許

唐韓王元嘉少好學聚書至萬卷又搜採碑文古跡
 得異本

舒王元名為石州刺史何二十年高潔賞玩林泉有
 塵外之意

岐王範多聚書畫古跡為時所重

册府元龜

淮南李嗣京參閱

西極文翔鳳訂正

豫章黃國琦較釋

宗室部 三十三

退讓 專政

退讓

易曰卑而不可踰書美群后德讓蓋讓之為德也其至矣哉矧乃聯華帝胄廁於藩戚而能識知退之理踐宗讓之言思害盈福謙之誠杜過制失軌之漸是

之謂令德也三代以上靡得而記漢室而下訖與隋
 唐乃有固守謙退不求聞達邈畏盛滿捨去權寵或
 稱疾以求奉祀或辭賞以懼公議或頽寢殊禮以申
 素志或表讓兵政以授能者或退身以弭天變或推
 功以避封爵斯皆深達損益之理能守止足之訓蓋
 富而無驕寵而能降者素士之所難也矧於公族乎
 斯足以稱賢矣

漢楚元王孫辟疆武帝時隨二千石論議冠諸宗室
 清靜少欲不肯仕

後漢順陽懷侯嘉光武族兄也建武三年從到維陽

從征伐拜為千乘太守六年病上書乞骸骨徵詣京

師

城陽王祉光武族兄春陵康侯敬之子也建武十一
 年祉疾病上城陽王璽綬願以列侯奉先祭祀帝自
 臨其疾

東海恭王疆光武子也建武二十年帝優以大封兼
 食魯郡合二十九縣賜虎賁旄頭宮殿設鍾簾之懸
 擬於乘輿疆臨之國數上書讓還東海又因皇太子
 固辭帝不許深嘉歎之

東平王蒼光武子也為驃騎將軍位在三公上永平

四年蒼以在朝數載名所隆益而自以至親輔政聲望日重意不自安上疏歸職曰臣蒼疲駑特為陛下慈恩覆護在家備教道之仁升朝蒙爵命之首制書褒美班之四海舉負薪之才負薪喻小子人并君子之罷凡

匹夫一介尚不忌簞食簞竹器也圓日簞方日筭之惠况臣君宰

相之位同氣之親哉宜當暴骸骨為百僚先而愚頑

之質加以固病誠羞負乘辱汗輔將之位將被詩人

三百赤紱之刺赤紱大夫之服令方域晏然要荒無傲將遵

上德無為之時也文官猶可并省武職尤不宜建昔

象封有庠不任以政誠由愛深不忍揚其過惡前事

之不忘來事之師也自漢興以來宗室子弟無得在

公卿位者惟陛下審覽虞帝優養母弟遵承舊典終

卒厚恩乞上驃騎將軍印綬退就籓國顧蒙哀憐帝

優詔不聽其後數陳乞辭甚懇切五年乃許還國而

不聽上將軍印綬章帝建初六年詔沛濟南東平中

山四王贊皆勿名蒼既至升殿乃拜天子親答之其

後諸王入宮輒以輦迎至省閣乃下蒼以受恩過禮

情不自寧上疏辭曰臣聞貴有嘗尊賤有等威卑高

列序上下以理陛下至德廣施慈愛骨肉既賜奉朝

請咫尺天儀而親屈至尊降禮下臣每賜謙見輒興

席改容中宮親拜事過典故臣惶怖戰慄誠不自安每會見蹶踏無所措置此非所以章示群下安臣子也帝省奏歎息愈褒賞焉

晉齊獻王攸武帝子也帝詔曰諸藩王令自選國內長史攸奏議曰昔聖王封建萬國以親諸侯軌迹相承莫之能改誠以君不世居則人心偷幸人無嘗主則風俗爲薄是以先帝深覽經遠之統思復先哲之軌分土畫疆建爵五等或以進德或以酬功伏惟陛下應期創業樹建親戚聽使藩國自除長史而今草創制度初立雖庸蜀順軌吳猶未賓宜俟清泰乃議

復古之制書比三上輒報不許其後國相上長吏缺典書令請求差選攸下令曰忝受恩禮不稱惟憂至於官人叙才皆朝廷之事非國所宜裁也其令自上請之時王家人衣食皆出御府攸表租秩足以自供求絕之前後十餘上帝不許

會稽文孝王道子簡文子也孝武太元初拜散騎嘗侍中軍將軍進驃騎將軍後公卿奏道子親賢莫二宜正位司徒固讓不拜使錄尚書六條事尋加開府領司徒及謝安夢詔曰新喪哲輔華戎未一自非明賢懋德莫能綏御內外司徒聊邪王道子體道自然

神識穎達寔當且奭之重且摠二南之任可領揚州
刺史錄尚書假節都督中外諸軍事衛府文武一以
配驃騎府讓不受數年領徐州刺史太子太傅公卿
又奏宜進位丞相揚州牧假黃鉞羽葆鼓吹並讓不
受及恭帝爲瑯琊王道子受封會稽國并宣城爲五
萬九千戶安帝踐阼有司奏道子宜進位太傅揚州
牧中書監假黃鉞備殊禮固讓不拜又解徐州詔內
外衆事動靜諮之帝旣冠道子稽首歸政王國寶始
摠國權勢傾朝廷王恭乃舉兵討之道子收國寶斬
之乃乞解中外都督錄尚書以謝方岳詔不許

武陵威王晞孝武帝子初穆帝時爲太宰海西公太
和初加羽葆鼓吹入朝不趨贊拜不名劍履上殿皆
固讓

宋臨川烈武王道規高祖少弟也爲輔國將軍以義
勲遷使持節都督荆寧秦梁雍司州之河南六州軍
事領護南蠻校尉荊州刺史道規辭南蠻以授殷叔
文

臨川王義慶道規子也元嘉中爲丹陽尹加右僕射
會太白犯左執法義慶懼有災禍乞求外鎮文帝詔
譬之曰玄象茫昧旣難可了且史家諸占各有異兵

星王時有所干犯乃桓玄當誅以此言之益無懼也
鄭僕射亡後左執法當有變王光祿至今平安日蝕
三朝天下之至忌晉孝武初有此異彼庸主耳猶竟
無佗天道輔仁福善謂不足橫生憂懼也與後軍各
受內外之任本以維城表裏經之盛衰此懷實有由
來天必降災寧可千里逃避耶非遠者之事又不知
吉凶定所若在都則有不測去此必保利貞者豈敢
苟違耶義慶因求解僕射乃許之加中書令進號前
軍營侍尹如故

江夏文獻王義恭武帝子也武帝即位授持節都督

揚州南徐二州諸軍事孝建元年十一月遷鎮京口
二年春督東南兖二州徵為揚州刺史加入朝不趨
贊拜不名劍履上殿義恭固辭殊禮又解持節都督
南譙王義宣武帝子也文帝時為中軍將軍揚州刺
史值元凶弑立孝武入討義宣遣參軍徐遺寶率眾
三千助為前鋒孝武即位以義宣為中書監都督揚
豫二州丞相錄尚書六條事改封南郡王進謚義宣
所生為獻太妃封次子宜陽侯愷為南譙王食邑千
戶義宣固辭內任及愷王爵於是改授都督荆湘雍
益梁寧南秦八州諸軍荆湖二州刺史持節侍中丞

和如故降愷爲宜陽縣主

南平穆王鑠文帝第四子也元嘉二十六年進號平西將軍讓不拜

始安王休仁文帝第十二子明帝卽位爲揚州刺史時諸方逆命休仁督征討諸軍事中流平定休仁之力也乃增休仁邑四千戶固辭乃受千戶上流雖平薛安都據彭城招引後魏復都督比討諸軍事又增食邑三千戶不受

南齊豫章王彧太子第二子也武帝永明元年領太子太傅解中書監手啓帝曰陛下以獻孝纂業萬寓維新諸弟有序臣屢荷隆愛叨授台首不敢固辭俛仰祗寵心魂如失負重量力古今同規臣窮生如浮質棟空素任居鼎石已移氣序自頃以來宿疾稍纏心慮恍惚表於容狀視此根體嘗恐命不勝恩加以星緯屢見災祥雖脩短有嘗能不耿介此心欲從俗啓解今職但歷辭爲鄙或貽物訥所以息意緘默一委時運而可復加寵榮增其顛墜且儲傳之重實非嘗選遂使太子見臣必束帶宮臣皆再拜二三之宜何以當此臣近亦侍言太子告意子良且因王儉申啓未知粗上聞否福慶方隆國祚永始若天假臣年

得預人伍唯當請隆貂璫以飾微軀永侍天顏以惟
畢世此臣之願也服之不衷猶爲身災况寵爵乎殊
榮厚恩必誓以命請帝荅曰事中恐不得從所陳三
年文惠太子講孝經畢求解太傅不許皇孫婚竟又
陳解詔曰公惟德惟行無所厝辭且魯且衛其誰與
二方式範當時流聲史籍豈容屢秉撝謙以乖期寄
疑嘗慮盛滿又因宴言求解揚州授竟陵王子良帝
終不許曰畢汝一世無所多言疑自以地位隆重深
懷退讓比宅舊有園田之美乃盛脩理之七年啓求
還第帝令世子庶代鎮東府疑進位太司馬八年給

車輪車尋加中書監固辭

梁臨川靖惠王宏太祖第六子也宏有七子正義正
德正則正立正表正信世子正仁爲吳興太守有治
能天監十年卒謚曰哀世子無子高祖詔羅平侯正
立爲世子由宏意也宏薨正立表讓正義爲嗣高祖
嘉而許之封正立千戶侯正意先封平樂侯正德西
豐侯正則樂山侯正立羅平侯正表封山侯正信封
化侯
長沙元王弟藻文帝孫也武帝天監十年自南瑯琊
太守入爲侍中藻性謙退不求聞達後出爲丹陽尹

太通六年入爲尚書左僕射加侍中藻固辭不就詔不許

後魏武昌簡王平原道武子河南王暉之孫也平原有五子長子和爲沙門捨其子顯以爵讓其次弟鑒固辭詔許其身鑒終之後令顯襲爵鑒乃受之

京兆王繼道武曾孫南平王齊第二子也以藩王宿官舊貴孝文時歷內外顯任意遇已隆靈太后臨朝入居心膂燕處門下歷轉台司繼子又居權重榮赫一世繼頻表遜位乞以司徒授崔光詔遣侍中安豐王延明給事中黃門侍郎盧同敦勸繼又啓固讓轉

太保侍中如故加後部 吹頻表陳辭不許又轉太傅侍中如故頻讓不許又遣敦使勸乃受之靈太后臨朝除特進驃騎將軍侍中領軍如故繼頻表固讓許之及門下八坐奏追論繼太和中慰諭高車安輯四鎮之勳增邑一千五百戶繼又上表陳讓詔聽減五百

城陽王壽景穆之子也壽子徽爲吏部尚書加侍中征東將軍遷武衛將軍右光祿大夫拜尚書左僕射轉車騎將軍儀同三司固辭不拜聽解侍中然後受詔後以從莊帝北巡之功除侍中太司馬太尉公邑

二萬戶徽表辭官封前後屢上又啓云河上之功將
士之力求迴所加授諸勳義徽爲莊帝親侍內懼爾
朱榮等故有此辭以防外議莊帝識其誠心聽其辭
封不許讓官

彭城王勰獻文子也孝文時爲中書監侍中孝文南
討漢陽假勰中軍太將軍加鼓吹一部勰以寵授煩
煩乃面陳曰臣聞燕親疎而兩竝異同而建此旣成
文於昔臣願誦之於後陳思求而不允愚臣不請而
得豈但今古云殊遇否太異非徒曹植遠羨於臣是
亦陛下賤魏文而不顧帝大笑執勰手曰二曹才名

相忌吾與汝以道德相親緣此而言無慙前烈汝但
克已復禮更何多及又從孝文征沔北及車駕還京
行飲至策勳之禮增邑一千戶勰辭曰臣受遇緣親
榮枯事等以此獲賞深乖情願乞追成旨用息謗言
詔以勰爲司徒太子太傅

高陽王雍獻文子也靈太后時鎮司州牧詔雍乘步
挽出入掖門又以本官錄尚書事雍頻表辭遜優答
不許詔侍中敦諭

廣陵王羽獻文子也領廷尉卿車駕南討命羽留守
羽表辭廷尉不許

趙郡王幹獻文子也幹子諶爲鴻臚少卿遷後將軍泗州刺史固辭不拜後以親例封上蔡縣開國公食四百戶讓而不受

後周齊王憲太祖第五子高祖時累有戰功自以威名日重潛思屏退及帝欲親征北蕃乃辭之以疾帝變色曰汝若憚行誰爲吾使憲懼曰臣陪奉鑾輿誠爲本願但身嬰疹疾不堪領兵帝許之

隋觀德王雄高祖族子也初改封安德王歲餘授懷州刺史尋拜京兆尹帝親征吐谷渾詔雄總管澆河道諸軍及還改封觀德王上表讓曰臣早逢興運預

班未屬有命有時藉風雲之會無才無德濫公卿之首蒙先皇不次之賞荷陛下非分之恩久紊台觀常慮盈滿豈可仍叨匪服重竊鴻名臣實面墻敢緣往例臣誠昧寵交懼身責昔劉賈封王豈備二階之任曹洪上將寧超五等之爵况臣衮章踰於帝子京尹亞於皇枝錫土列藩紐金開國於臣何以自處在物謂其乖分是以露款執愚斬恩固守伏願陛下曲留睿矚特鑒丹誠類觸宸嚴伏增流汗優詔不許

唐宋王成罷睿宗子也玄宗先天初進位太尉成罷固辭太尉之命帝嘉其意許之制曰宋王成罷温良

恭儉明允篤誠朕之元昆人之師表聞者鼎席虛位
台陛俟能堅守讓詞願移成命互聯華於補職更參
議於論道可開府儀同三司開元十四年兼太常卿
成器又上言曰臣聞選賢任職量能授官苟非其才
聖貽厥咎臣本遇劣累忝榮任叨居禮樂之司實乖
河海之任吹庭鍾鼓克諧謝於昔人疎署威儀爲政
慙於社哲僂俛從事于茲六年詩稱素餐於是乎在
伏惟開元神武皇帝陛下繼業昭暢仁化清和乘暇
奏薰風之琴追賞聚雲和之曲典章斯備雅亮攸歸
遠美威英獨冠區宇臣幸膺國戚久亞台陛兼管寺

卿實黷朝憲惡盈之誡列在前經過寵之談復聞斯
日願矜其庸昧授以良能人無異言官無曠位伏使
晨趨北闕奉漢幄之龍顏夕赴西園飛魏庭之華蓋
則臣之願畢矣聖主之恩深矣不任悚望翹勤之至
謹詣朝堂奉表陳讓以聞帝覽表重違其意手詔曰
開府儀同三司兼太常卿寧王憲秉德夷遠體道淳
深頃以茂親典司宗祧禮經之文旣備鍾律之度已
和威而不居謙以自牧固辭兼領情所重違宜遂雅
懷俾停劇務

專政

夫竝建周親藩屏王室所以深根固本爲不可拔者也故詩曰太宗維翰又曰懷德維寧是以內有骨肉之親外有藩翼之衛強弱相制枝葉相持此周漢所以爲得也吳晉之後法制過差始以親親假其勢位終以驕蹇顛乎威福或本根之莫庇或干戈之日尋小者踰越法度大者傾敗邦政斯所謂寵之適所以禍之也得失之際可不鑒哉是以著其始終盛衰之變以存歷代之戒哉

魏曹爽太祖族子真之子也爲大將軍假節鉞都督中外諸軍事錄尚書事封武安侯邑萬二千戶賜

履上殿入朝不趨燒拜不名丁謐畫策使爽白天子發詔轉宣王爲太傅外以名號尊之內欲令尚書奏事先來由已得制其輕重也

吳孫峻大帝末爲侍中受輔政領武衛將軍旣誅諸葛恪遷吳丞相大將軍督中外諸軍事初群臣上奏其推峻爲太尉議騰胤爲司徒時有媚峻者以爲大統宜在公族若滕胤爲亞公聲名素重衆心所附不可貳也乃表以峻爲丞相又不置御史大夫士人皆失望矣

孫綝廢帝時自偏將軍代孫峻爲侍中武衛將軍領

中外諸軍事知朝政景帝時絀一門五侯皆典禁兵
權傾人主自吳國朝臣未嘗有也

昔趙王倫既誅賈后遂爲使持節天都督中外諸軍
事相國侍中一依宣文輔魏故事百官總已聽於倫
齊王同既誅趙王倫因留輔政坐拜百官符勅臺府
淫營尊驕一朝覲此狂恣不肅之容也天下莫不
高其功而慮其亡也罔終弗改遂至夷滅
成郡王穎爲太尉大將軍都督中外諸軍假節加黃
鉞錄尚書事鎮業及齊王同之敗頗懸執朝政事無
巨細皆就鄴諮之

東安王繇既誅楊駿後專斷刑賞威震內外

會稽王道子爲錄尚書都督中外諸軍事世子元顯
時年十六爲侍中心惡王恭請道子討之乃拜元顯
爲征虜將軍其先衛府及徐州文武悉配之于時王
恭威鎮內外道子甚懼復引譙王尚之以爲腹心尚
之說道子曰藩伯疆盛宰相權輕密宜樹置以自藩
衛道子深以爲然乃以其司馬王愉爲江州刺史以
備恭與尚之等日每謀議以伺四方之隙王恭知之
復舉兵以討尚之爲名荊州刺史殷仲堪豫州刺史
庾楷廣州刺史桓玄竝應之道子使人說楷曰本情

相與可謂斷金往年帳中之飲結帶之言寧可忘邪
卿今棄舊交結新援忘王恭疇昔陵侮之耻乎若乃
欲委體而臣之若恭得志以卿爲反覆之人心不相
信何富貴可保禍敗亦旋及矣楷怒曰王恭昔赴山
陵相王憂懼無計我知事急即勒兵而至去年之事
亦侯命而奮我事相王無相負者既不距恭反殺國
寶自爾已來誰復敢攘袂於君之事乎庾楷實不能
以白口助人屠滅當與天下同舉誅鉏姦臣何憂府
不開爵不至乎時楷已慮恭檄正後士馬信反朝廷
憂懼於是內外戒嚴元顥攘袂慷慨謂道子曰去年

不討王恭致有今後若夫從其欲則太宰之禍至矣
道子曰飲醇酒而委事於元顥元顥雖年少而聰明
多涉志氣果銳以安危爲已任尚之爲之羽翼時相
傳會者皆謂元顥有明帝神武之風於是以爲征討
都督假節統前將軍王絢左將軍謝琰及將軍桓之
才毛泰高素等伐恭滅之旣而楊佺期桓玄殷仲堪
等復至石頭元顥於竹里馳還京師遣丹陽尹王愷
翻陽太守桓放之新蔡內史何嗣賴川太守溫詳新
安太守孫泰等發泉邑士庶數萬人據石頭以拒之
道子將出頓中堂忽有驚馬蹂籍軍中因而擾亂赴

江而死者甚衆仲堪旣知王恭敗死狼狽西走與桓
玄屯于潯陽朝廷嚴兵相距內外騷然詔元顥甲仗
百人入殿尋加散騎嘗侍中書令又領軍持節都督
如故會道子有疾加以昏雜元顥知朝望去之謀奪
其權諷天子解道子楊州司徒而道子不之覺元顥
自以少年頓居權重慮有譏議於是以瑯琊王領司
徒元顥自爲楊州刺史旣而道子酒醒方知去職於
是大怒而無如之何廬江太守會稽張法順以刀筆
之材爲元顥謀主交結朋援多樹親黨自桓謙以下
諸貴遊皆歛衽請交元顥性苛刻生殺自己法順屢

諫不納又發東土諸郡免奴爲客者號曰樂屬移置
京師以充兵後東土蹶然人不堪命天下苦之矣旣
而孫恩乘釁作亂加道子黃鉞元顥爲中軍以討之
又加元顥錄尚書事然道子爲長夜之飲政無大小
一委元顥道子爲東錄元顥爲西錄西府中騎填湊
東第門下可設雀羅矣元顥無良師友正言弗聞諛
譽日至或以爲一時英傑或謂爲風流名士由是自
謂無敵天下故驕侈日增帝又以元顥有翼亮之功
加其所生母劉氏爲會稽王夫人金章紫綬會稽陽
覆沒道子以山陵幽辱上疏送章綬請歸藩不許及

太皇太后喪詔道子乘輿入殿元顥因諷禮官下議稱已德隆望重既錄百揆內外群僚皆應盡敬於是公卿皆拜于時軍旅薦興國用虛竭自司徒已下日廩七升而元顥聚斂不已富過帝室及謝琰爲孫恩所害元顥求領徐州刺史加侍中後將軍開府儀同三司都督十六州諸軍封其子彥璋爲東海王尋以是變元顥解錄復加尚書令會孫恩至京日元顥柵斷石頭率兵距戰頗不利道子無佗謀略唯日禱蔣侯廟爲厭勝之術旣而孫恩道子遁于北海桓玄復據上流致踐於道子曰賊造近郊以風不得進以雨

不致火食盡故去耳非力屈也昔國寶卒後王恭不乘此威入統朝政足見其心非侮於明公也而謂之非忠今之貴要腹心有時流清望者誰乎豈可云無佳勝直是不能信之耳用理之人然後可以信義相期求利之徒豈有所惜而更委信邪爾求一朝一夕遂成今日之禍矣阿衡之重言何容易求福則立至於忤或致禍在朝君子豈有不懷但懼害及身耳玄忝任在遠是以披寫事實元顥覽而大懼張法順謂之曰桓玄承藉門資素有豪氣旣并殷楊專有荆楚然桓氏世在西藩人或爲用而第下之所控引正三

吳耳孫恩爲亂東土塗地編戶饑饉公私不贍玄必乘此縱其奸覓竊用憂之元顥曰爲之柰河法順曰玄始據荊州人情未輯方就綏撫未遑佗計及其如此發兵誅之使劉牢之爲前鋒而弟下以大軍繼進桓玄之首必懸於麾下矣元顥以爲然遣法順至京口謀於牢之而牢之有疑色法順還說元顥曰牢之言色必二於我未若召入殺之不爾敗人大事元顥不從道子尋拜侍中太傅置左右長史司馬從事中郎四人崇異之儀備盡盛典其驃騎將軍僚佐文武卽配太傅府加元顥侍中驃騎大將軍開府征討大

都督十八州諸軍事儀同三司加黃鉞班劍二十人以伐桓玄竟以牢之爲前鋒法順又言元顥曰自舉大事未有威斷桓謙兄弟每爲上流耳目斬之以孤荆楚之望且事之濟不繼在前軍而牢之反覆萬一有變則禍敗立至可令牢之殺謙兄弟以示不貳若不受命當逆爲其所元顥曰非牢之無以當桓玄且始事而誅大將人情必動二三不可于時楊士饑虛運漕不繼玄斷江路商旅遂絕於是公私匱乏士卒唯給桴橡大軍將發玄從兄驃騎長史石生馳使告玄玄進次尋陽傳檄京師狀罪元顥俄而玄至西陽

帝戎服餞元顥于西池始登舟而玄至新亭元顥棄船退屯國子學堂明日列陣於宣陽門外元顥佐吏多散走或言已至大桁劉牢之遂降于玄元顥廻入宣陽門牢之參軍張暢之率衆逐之衆潰元顥奔入相府唯張法順隨之問計於道子道子對之泣玄遣大從事中郎毛泰收元顥送於新亭縛於船前而數之元顥答曰爲王誕張法順所誤于是送付廷尉并其六子皆害之玄又奏道子醜縱不孝當棄市詔徙安成郡使御史杜竹林防衛竟承玄旨醜殺之時年三十九帝三日哭於西堂

宋彭城王義康爲侍中都督南徐兗三州諸軍事司徒錄尚書事南徐州刺史與揚州刺史王弘共輔朝政弘旣多疾且每事推謙自是內外衆務一斷之義康性好吏職銳意文案旣專揔朝權事决自巳生殺天事以錄命斷之凡事陳奏無不可方伯已下竝委義康授用由是朝野輻湊勢傾天下

後魏元義江陽王繼之第二子靈太后臨朝以義妹夫累遷侍中領軍旣在門下兼總禁兵深爲靈太后所信委及清河王懌被殺與高陽王雍寺輔政嘗直禁中孝明呼爲姨夫自後專綜機要巨細决之威震

於內外百僚重跡

後周晉公宇文護文帝之兄子也為大冢宰武帝立百官總於護自文帝為丞相立左右十二軍總屬相府後皆受護處分凡所徵發非護不行護屯兵禁衛盛於宮闕事無巨細皆先斷後聞

丹府元龜

淮南李嗣京參闕

西極文翔鳳訂正

豫章黃國琦較釋

宗室部 三十四

復爵

自周成以來竝建懿戚大啓土宇所以疆幹弱枝傳祚遐世顧豈欲絕之者哉其或反道敗德弗率王庭作威弛禁侵害吏治則削而絀之用殄厥世斯蓋不得已而為之也然後推敦族之恩申猶宥之典赦其

罪戾還其璽綬或則加禮謚於既沒復爵土於嗣子
俾宗祊無損邦畿如舊霈然渥縟與之更始亦有被
誣見疑非辜遭禍率用追復以申其寃斯皆厚親親
之仁成元宗之美也

漢淮南王長高祖少子以謀反遷蜀道死民有作歌

歌淮南王曰一尺布尚可縫一斗粟尚可舂兄弟二

人不相容一尺布可縫而共衣一斗粟可舂而文帝

聞之曰昔堯舜放逐骨肉周公殺管蔡共食况以天下之廣而不相容也

堯舜之同姓皆云天下稱聖不以私害公天下豈以為我貪淮南

地耶迺徙城陽王王淮南故地而追尊淮南王為厲

王置園如諸侯儀

後漢楚王英以逆謀廢徙丹陽涇縣明年至丹陽自

殺詔遣光祿大夫持節弔祠賜賜如法家賜列侯印

綬以諸侯禮葬於荆元和三年又遣謁者備王官屬

迎英喪改葬彭城加王赤綬羽蓋華藻如嗣王儀追

爵謚曰楚厲侯

阜陵王延以逆謀貶爵為侯章帝行幸九江賜延書

與車駕會壽春帝見延及妻子愍然傷之乃下詔曰

昔周之爵封千有八百而姬姓居半者所以禎榦王

室也朕南巡望淮海意在阜陵遂與侯相見侯志意

衰落形體非故瞻省懷感以悲今復侯為阜陵王增封四縣并前為五縣

齊王晃光武兄伯升曾孫晃與太姬宗更相誣告章和元年有司奏請免晃爵為庶人徙丹徒帝不忍下詔貶晃爵為蕪湖侯遣謁者收晃璽綬晃立十七年而降爵晃卒子無忌嗣帝以伯升首創大業而後嗣罪廢心嘗愍之時北海亦絕無後詔令復三國永元二年乃復封無忌為齊王

勃海王惺謀為不道有司請廢之桓帝不忍貶為癭陶王食一縣惺後因中嘗侍王甫求復國計謝錢五

千萬桓帝遺詔復為渤海王

魏巴氏公琮坐於中上方作禁物貶爵都鄉侯明帝

景初三年復巴氏公

吳齊王奮廢帝徙後廢帝太平三年封為章安侯詔曰齊王奮前坐殺吏廢庶人連有赦今獨不見原縱未宜復王何以不侯又諸孫兄弟作將列在江渚孤有兄獨爾云有司奏可就拜為侯

晉高陽王睦宣帝之子也初封中山王坐誘逋亾貶封丹水縣侯太康初詔復爵有司奏封江陽王武帝曰睦退靜思愆改脩其德今有爵土不但以赦江陽

險遠其以高陽郡封之乃封為高陽王

汝南王亮為楚王瑋所害及瑋誅追復亮爵位喪葬之禮如安平獻王孚故事廟設軒懸之樂

汝南郡王羨汝南王亮之子永興初為侍中以長沙王又黨廢為庶人惠帝還雒復羨封為撫軍將軍又以汝南期思西陵益其園

齊王冏為長沙王又所害惠帝光熙初追冊曰咨故大司馬齊王冏昔以宗藩穆裔紹世緒于東國作翰許京兆鎮靜我王室誕率義徒同盟觸澤克成元勳大濟京朕用庶嘉茂績謂篤爾勞俾式先典以疇

茲顯懿廓土殊分跨兼吳楚崇禮備物寵侔蕭霍庶憑翼戴之重永隆邦家之望而恭德不逮取侮二方有司過舉致王于戮古人有言曰用其法猶思其人况王功濟朕身勲存社稷追惟既往有悼於厥心哉今復王本封命嗣子還紹厥緒禮秩典度一如舊制使持節大鴻臚即墓賜策祠以大牢魂而有靈祇奉朕命肆寧爾心嘉茲寵榮子超嗣爵永嘉中懷帝下詔重述冏倡義元勳還贈大司馬加侍中假節追謚成都王穎既死汲桑載穎棺於軍每事啓靈以行軍令桑敗棄棺於故井中穎故臣收之改葬於雒陽懷

帝加以縣王禮

東安王繇以專行誅賞兄澹因隙譖之汝南王亮惑其說免繇官以公就第坐有悖言廢徙帶方惠帝永康初徵繇復封後遭母喪在鄴勸成都王穎解兵為穎所害永寧元年九月追復其爵

河間王顥安平獻王孚孫為南陽王模使人拒殺之武帝咸和六年六月復顥爵位

棘陽王奇義陽王望孫望薨奇襲坐遣三部吏到交廣商貨為有司所奏武帝太康九年詔貶為三縱亭侯立為棘陽王

東萊王蕤齊王冏兄冏輔政蕤與左衛將軍王與謀共廢冏事覺免為庶人尋詔徙蕤上庸後封後陽侯上庸內史陳鍾承冏旨害蕤冏死詔誅鍾復蕤封改葬以王禮

吳王宴武帝子與兄淮南王允共攻趙王倫允敗倫貶晏為賓徒縣王後徙封代王倫誅復本封

武陵王晞為太宰為桓溫所忌溫逼新蔡王晃自誣與晞及晞子綜等謀逆請誅之簡文帝不許溫奏徙新安郡家悉徙之太原六年晞卒考武帝三日臨于西堂詔曰感惟摧慟便奉迎靈柩并改移妃庶氏及

故世子梁王諸喪家屬悉還復下詔曰故前武陵王體自皇極尅已思愆仰惟先朝仁宥之旨豈可情理靡寄其追封新寧郡王邑一千戶十二年追復暕武陵國王

梁王綰暕子出繼梁王翽與父暕俱廢薨子穌嗣孝武太元中復國

宋廬陵王義真高祖子也少帝失德徐羨之等密謀廢立則次第應在義真以義真輕耿不任主社稷因其與少帝不協乃奏廢爲庶人徙新安郡景平二年六月羨之等遣使殺於徙所文帝元嘉元年八月詔

曰前廬陵王靈柩在遠國封墮替感惟推慟情若貫割王體自天極地戚屬尊卑豈可令情禮永淪終始無寄可追復先封特遣奉迎并孫脩華謝妃一時俱還言增摧哽三年正月誅徐羨之傅亮等是日詔曰故廬陵王舍章履正英哲自然道心內昭徽風遐被遭時多難志立權逼天未悔禍運鍾屯險群凶肆醜專竊國柄禍心潛構釁生不圖朕每永念讐耻含痛內結尊養奸慝情禮未申今王道旣孚政刑始判宜昭國章於是乎在可追崇侍中大將軍王如故庶慰冤魂少申悲憤

江夏王義恭高祖子也爲前廢帝所害太宗定亂令書曰故中書監太宰領太尉錄尚書事江夏王道性淵深膺鑒通遠樹聲列藩宣風鉉德位隆姬輔任屬負圖勤勞國家方熙託付之重盡心毗遵永融雍穆之化而凶醜忌威奄加冤害夷戮有暴殞安無聞憤達幽明痛貫朝野朕蒙險在難含哀莫申幸賴宗社之靈克纂祈天之祿仰惟勳戚震慟厥心昔梁王徵庸警蹕備禮東平好善黃屋在御况公德猷弘懋爰典未殊者哉可追崇使持節侍中都督中外諸軍事丞相領太尉中書監錄尚書事如故給九旒鸞輅虎賁班劍百人前後部羽葆鼓吹輜輶車

安隆王獻江夏王義恭子爲元凶所害孝武大明二年追封安隆王追謚宣王

贈江夏王伯禽亦義恭子也伯禽官輔國將軍爲前廢帝所害謚曰哀世子又追贈江夏王改謚曰愨伯始平王子鸞孝武之子孝武諸子多爲前廢帝所害廢帝素疾子鸞有寵遣使賜死同生弟妹竝死及明帝即位詔曰夫紆寃伸痛雖往必追緣情測愛感事彌遠故使持節都督南徐州諸軍事撫軍南徐州刺史新安王子鸞威表成羈早延殊寵方樹美業克光

藩維而凶心肆忌奄罹橫禍與言永傷有蕪嘗懷宜
 旌天秀以靈沉魂可贈使持節侍中都督南徐兗二
 州諸軍事司徒南徐州刺史王如故第二皇子子師
 俱嬰謬酷有增酸悼子師復先封為南海王並加徽
 謚

南齊明帝初輔政所誅諸王及卽位後復屬籍籍各
 封諸子為侯梁長沙元王弟藻武帝普通三年遷領
 軍將軍加侍中六年為軍師將軍與西豐侯正德比
 伐渦陽輒班師為有司所奏免官削爵土七年起為
 宗正卿八年復封爵

臨賀王正德普通六年逃奔于魏七年又自魏逃歸
 高祖不之過也復其封爵

後魏河間公齊太武時坐事免官爵後為前將軍尅
 仇池威震羗氏復賜爵河間公

襲江陽王繼為青州刺史後入為度支尚書繼在青
 州之日民飢餒為家僮取民女為婦妾又以良人為
 婢為御史所彈坐免官爵靈太后臨朝復繼尚書本
 封

襲廣陽王深為葛榮所害莊帝追復王爵謚曰忠武
 汝陰王天賜為懷朔大將軍坐貪殘怒死削除官爵

卒孝文罷於思政觀贈本爵塋從王禮謚曰靈王
 東平王正為度支尚書又兼宗正卿每有奏請尚書
 令任城王澄時致執奪正剛隘內遂不平澄因是奏
 正罪狀三十餘條廷尉處以死刑詔付入議特加原
 宥削爵除官孝明孝昌初卒追復本爵改封濟南王
 中山王英為鎮南將軍行揚州梁遣將寇肥梁詔英
 率眾討之英表云可尅後水盛英及諸將狼狽奔退
 上眾沒者十五六有司奏英經筭失圖案劾處死詔
 恕死為民後復王封邑千戶

樂陵王思譽為鎮北大將軍及穆泰陰謀不軌思譽

知而不告恕死削封為庶人孝文太和未復還其王

爵

京兆王愉出為冀州刺史謀逆事敗見執徵赴京師
 至野上絕氣而死或云高肇令人殺之後靈太后令
 愉之四子皆附屬籍追封愉臨洮王子寶月乃改塋
 父母追服三年

齊郡王琛以討鮮于脩禮敗免官爵後討汾晉朔屬
 卒於軍追復王爵

北海王詳獻文子也宣武親政尚書高肇譖詳與茹
 皓等謀為逆亂付廷尉治罪詔免為庶人別營坊館

如法禁衛限以終身詳哭數聲而暴死停殯五載永平元年十月詔曰故太傅北海王體自先皇特鍾友愛受遺訓輔冲昧攸託不圖暮節晦德終缺哀榮使可追復王封射日營厝少慰幽魂以旌陰戚謚曰平王

咸陽王禧謀反賜死後孝明王光中復禧王爵葬以王禮

襲趙郡王謚在毋喪聽音聲飲戲為御史中尉李平所彈遇赦復封

樂梁王長命坐殺人賜死除國子忠明帝時復前爵

註

襲安樂王鑒為北討大都督討葛榮與都督裴衍共救信都鑿謀反降葛榮都督源子邕與裴衍圖鑿斬首傳維詔改姓元氏莊帝初許復本族又特復鑿王爵贈司空

維陽王羯兒督諸軍討禿髮坐貪暴降爵為公後統河西諸軍襲蠕蠕至於漢南仍復王爵

慶陽王嘉之孫湛弟瑾以謀殺齊文襄土事泄命門伏法湛先有婢紫光生子法輪齊王矜湛覆滅乃成原之復其爵土

襲京兆王大興拜長安鎮太將軍以贖貨削除官爵
後除祕書監還復前爵

後周嘗武公魯郡惠公孫初封譚國公後與晉公護
同誅建德三年追復封爵嘗武公

唐巢王元吉高祖第四子武德元年封為齊王九年
與太子建成謀逆伏誅貞觀元年追封海陵郡王謚

曰刺十六年七月又詔曰有虞受終弘肆赦之典隆
周革命篤親親之恩海陵刺王元吉地維藩翰風承

朝寵陷於不軌得罪君親朕嗣膺靈命無忘敦睦同
主之重既切於本枝在原之悼寔纏於歲月興言泉

壤思備寵章可追封巢王謚乃依舊

荆王元景高祖第六子武德三年封為趙王貞觀十
年徙封荆王永徽三年坐與房遺愛謀反賜死國除
後追封沈黎王備禮改葬

韓王元嘉高祖第十一子武德四年封宋王五年徙
荆王貞觀十年改封韓王垂拱四年則天誅戮宗室
諸王不附已者元嘉大懼與其子黃國公及越王貞

父子謀起兵坐誅神龍元年追復爵土封其第五子
納為嗣韓王
是年二月制皇室子孫諸王自垂拱已
來非命者皆不埋殯且令州縣尋求處
所以牲牢致祭乃追復官爵備禮改殯其王并令陪
葬昭獻二陵有嗣者即令承襲無息嗣者取近親為

後
霍王元軌高祖第十四子武德六年封蜀王八年徙封吳王貞觀十年改封霍王垂拱四年坐與韓王元嘉通謀起兵事覺徙居黔州至陳倉而死長子緒封江都王坐與裴承光交通被誅神龍元年並追復爵土封緒孫暉爲霍王嗣

舒王元名高祖第十八子貞觀五年封譙王十年徙封舒王永昌中與其子豫章王亶俱爲丘神勣所陷被殺神龍元年復其官爵仍令以禮改葬封亶子津爲嗣舒王

魯王靈夔高祖第十九子貞觀五年封魏王十年徙燕王十四年改封魯王垂拱四年與韓王子黃國公譔結謀起兵事洩流辰州縊死有二子長子清河王誥少子范陽王諤亦爲酷吏所陷神龍元年追復靈夔官仍令以禮改葬封諤子道堅爲嗣魯王
江夏王道宗高祖從父兄之子永徽四年房遺愛伏誅長孫無忌褚遂良素與道宗不協上言道宗與遺愛交結流配象州道宗病卒及無忌遂良得罪乾封元年追復道宗官爵

吳王恪太宗第三子貞觀三年封蜀王十年徙封吳

王永徽四年房遺愛謀反遂因事誅恪以從衆望子
四人仁瑋琨境竝流于嶺表尋追封恪為鬱林王又
封仁為鬱林侯

蜀王愔太宗第六子吳王恪之母弟貞觀五年封梁
土十年改封蜀王恪既誅愔黜為庶人徙巴州尋改
為涪陵王咸亨初追復爵土陪葬昭陵謚曰悼封子
璿為嗣蜀王

越王貞太宗第八子貞觀五年封濮王十年徙封原
王尋改封越王垂拱四年貞及其子瑯琊王冲坐與
韓王元嘉結謀起兵被誅改姓虺氏神龍元年追復

土與子冲俱復舊姓

紀王慎太宗第十子也貞觀五年封申王十一年改封
紀王垂拱中越王貞將起事慎不肯同謀及貞敗慎
亦下獄臨行免改姓虺氏配流嶺表至蒲州而卒中
興初追復官爵

澤王上金高宗第三子永徽元年封杞王文明元年
封畢王又改澤王永昌元年出為隨州刺史武承嗣
使酷吏周興誣告上金謀反召至都恐懼自縊死神
龍元年追復上金官爵封庶子義詢為嗣澤王

許王素節高宗第四子永徽二年封雍王尋徙郟王

改葛王又進封許王出爲舒州刺史與澤王上金同被誣告追赴都縊死則天以庶人禮葬之神龍元年追封許王以禮改葬封少子瓘爲嗣許王

成王千里吳王恪之長子本名仁封鬱林侯中興初進封成王爲左金吾衛將軍三年節愍太子謀殺武三思兵敗與其子天水王儉俱被誅改姓蝮氏景雲元年詔曰故成王千里保國安人克成忠義願除凶醜翻陷誅夷永言淪沒良深痛悼宜復舊官爵復本姓歸政郡王俊吳王恪第四子本名境中興初封歸政郡王宗正卿坐兄事貶南州司馬卒景雲元年追復宗正卿歸政郡王官爵

常山公倩越王貞第二子垂拱中坐與父貞兄冲連謀越兵被誅神龍初侍中敬暉等以冲父子翼戴皇家義存社稷請復其官爵武三思令上官昭容代中宗手詔不許開元四年詔追復爵土令備禮改葬侍王琰玄宗第四子也坐二孺人不相叶乃密求巫者書符置於琰屐中以求媚琰監院中官密奏於玄宗玄宗命推問之竟孺人也玄宗猶疑琰知情乃囚於鷹狗坊中絕朝請憂懼而死代宗寶應元年贈其王位

鄂王瑤玄宗第五子開元二十五年得罪廢寶應元年追復

光王琚玄宗第八子也有才力玄宗愛之以母見疎薄嘗有怨言爲人所構得罪寶應元年追復

齊王湊穆宗第六子也初封漳王後爲鄭注誣告王與宋申錫謀不軌降封巢縣公卒開成三年正月追封爲齊王

梁博王友文爲庶人友珪所害末帝即位詔曰我國家賞功罰罪必叶朝章報德伸冤敢欺天道苟顯違于法制雖斃滯于歲時終振大綱須歸至理重念太

祖皇帝嘗開霸府有事四方治建皇朝載遷都邑每以主留重務居守難才慎擇親賢方應寄任故博王友文才兼文武識達古今俾分憂於在浚之郊亦共理於興王之地一心無易二心于茲嘗施惠於士民實有勞於國家去歲郢王友誥嘗懷逆節已露亮鋒將不利於君親欲竊窺於神器此際宜先皇寢疾大漸日臻博王乃密上封章請嚴宮禁因以萊州刺史授於郢王友珪纔觀宣頭俄行大逆豈有自縊兵於內殿却翻事於東都又矯詔書枉加刑戮仍奪博王封爵又改姓名寃耻兩深誰欺何極伏賴上玄垂祐

宗社降靈俾中外以叶謀致遐邇之共怒尋平內難
 獲勦元凶既雪耻於同天且免讖於共國朕方期遁
 世敢竊臨人遽迺推崇爰膺禎嗣冤憤既伸於幽顯
 霽澤宐及於下泉博王宜却復官爵仍令有司擇日
 歸葬

後唐贈太保從璨明帝之諸子性剛直好客踈財意
 豁如也天成中為右衛大將軍時安重誨方秉事權
 從璨亦不之屈重誨常以此忌之明宗幸汴留從璨
 為大內皇城使一日召賓友於會節園酒酣之後戲
 登於御榻安重誨奏請誅之詔曰皇城使李從璨朕

巡幸汴州使警大內乃全垂委任但恣追遊於行
 從之固頻恣歌飲之會仍施法顯辱平人致彼誼
 譁達於聞聽方當立法固不當親宜貶授房州司戶
 參軍仍令盡命長典中重誨之得罪也詔復舊官仍
 贈太保

追封

冊元
 宗室部

宗室部 三十五
追封
傳日慎終追遠民德歸厚矣乃有聯華帝胄齒于宗
盟景命弗融遘茲短歷或未極封爵之制或不及光
華之旦或遭罹橫枉沉痛載懷或帝構艱難勲業靡
究繇是舉敦旅之義申追命之典以至胙土建國節

冊府元龜

宗室部 三十五

追封

淮南李嗣京參開

西極文翔鳳訂正

豫章黃國琦較釋

宗室部

冊府元龜

惠易名加尊極之稱并儲副之號備物典策麗章渥
綉斯王者與仁敦睦化下美俗之道又豈止厚親親
之恩而已哉

後漢建武十五年追謚兄伯升為齊武公兄仲為魯
哀公 又依本傳其年追謚伯年為齊武公

魏蕭懷王熊太祖子早薨黃初二年追封謚蕭懷公
太和三年又追進爵為王

鄧襄王冲太祖子建安十三年薨黃初二年追贈謚
冲曰鄧襄侯又追號為公太和五年加冲號曰鄧哀
王

范陽閔王矩太祖子也早薨無子建安二十二年以

樊安公均子敏奉矩後封臨晉侯黃初三年追封謚

矩為范陽閔公五年改封敏范陽王七年徙封太和

六年追進矩號曰范陽閔王

豐愍王昂太祖子也太祖南征為張繡所害黃初二

年追封曰悼公五年追加號曰豐悼王太和三年改

謚曰愍

矩殤王繇太祖子也早薨太和三年追封謚曰殤

濟陽懷王太祖子也建安十六年封西鄉侯早薨太

和四年追進爵謚曰懷公六年又進號曰懷王

廣宗殤公子棘太祖子也早薨太和五年追封謚曰殤公

郿戴公子整太祖子也建安二十二年封郿侯二十

三年薨黃初二年追謚曰戴公

靈殤王子京太祖子也早薨太和五年追封謚

臨邑殤公子上太祖子也早薨太和五年追封謚

剛殤公子勤太祖子也早薨太和五年追封謚

樊哀公子均太祖子也建安二十二年封樊侯二十

四年薨黃初二年追進公爵謚曰安

養城殤公子乘太祖子也早薨太和五年追封謚

臣欽

若等按魏裴松之注魏武諸子以母貴賤為次不計兄弟之年

贊哀王協文帝子早薨太和五年追封謚曰經殤公

青龍二年更追改爵謚為王

吳長沙桓王策太帝之兄也漢末為討逆將軍會稽

太守帝稱尊號追謚策曰長沙桓王

晉隋穆王整義陽王望之子初封清泉侯先父望卒

武帝以義陽一縣追封為隋縣王

城陽哀王兆字千秋文帝子年十歲而夭武帝踐祚

詔曰亡弟千秋少聰慧有成之質不幸早亡先帝先

后特所哀愍每追遺意情懷感傷於是追加兆詔封

遼東悼惠王定國文帝子年三歲薨咸寧初追加封

謚

廣陽殤王廣德文帝子年二歲薨咸寧初追加封謚

毗陵悼王軌武帝子年二歲而夭太康十年追加封

謚

渤海殤王恢武帝子太康五年薨時年二歲追加封

謚

南陽王彪愍懷太子子永康元年正月薨四月追封

臨川獻王郁會稽王道之子也寧康中追封謚

宋臨川王道規高祖少弟也初以起義功封華容縣

公後為征西大將軍義熙八年薨追封南郡公高祖

受命追封臨川王

新野懷王夷父文帝第十七子也元嘉二十九年薨

時年六歲泰始五年追加封謚

池陽縣侯懷遠晉熙王昶子也早卒明帝即位追封

池陽縣侯

齊敬王子羽孝武帝第十四子太明三年生當年卒

追加封謚

淮陽思王子霄孝武帝第二十三子也太明五年生

八年薨追加封謚

南齊衡陽王道度太和長兄仕至安定太守卒於宋

世建元二年追加封謚

始安貞王道生太祖次兄也宋世為奉朝請卒建元

元年追加封謚

始安貞王鳳貞王子明帝兄也官至正員郎卒於宋

世明帝建武元年贈始安靖王

安陸昭侯緬始安貞王之子也永明九年卒明帝建

武元年追贈

梁文宣侯尚之高祖從父也仕齊為步兵校尉卒官

天監初追謚

文宣侯尚之子靈均仕齊廣德令高祖義師行至會

稽郡事頃之卒高祖即位追封東昌縣侯

忠簡侯崇之高祖從父齊永明中為東陽太守時錢

塘瑀之反崇遇害天監初追謚高祖踐阼封崇之子吳為吳平侯乃追封

謚

長沙宣武王懿高祖長兄也仕齊為尚書令東昏時

遇害天監元年追崇承相封長沙郡王謚曰宣武

永陽昭王敷高祖次兄也齊建武四年薨高祖即位

追封永陽郡王謚曰昭

衡陽王暢高祖第四弟任齊至太嘗封江陵縣侯卒天監元年追封衡郡謚曰宣

桂陽王融高祖弟任齊太子洗馬永元中宣武之難融遇害天監元年追封桂陽郡王謚曰簡

陳始興昭烈王道談高祖兄也任梁為東宮直閣將軍侯景之亂援臺中中流矢卒紹泰二年追贈義興郡公謚曰昭烈高祖受禪重封始興郡王

南康郡王休先高祖母弟梁太清中卒高祖受禪追封南康郡王謚曰忠壯

豫章王立長沙王權皆高祖子永定二年追封立謚

曰獻權謚曰思

後魏高涼王孤平文皇帝子也道武時以孤平勲高追封高涼王謚曰神武

順陽王郁桓帝之後也文成時為殿中尚書賜爵順陽公及乙渾專權郁從順德門入欲誅渾渾窘怖遂

奉獻文臨朝後復謀殺渾為渾所誅獻文錄郁中正追贈順陽王謚曰簡

秦明王翰昭武帝子建國十五年卒道武即位追贈秦王謚曰明王翰子愨王觚使於慕容番番止觚道

武討中山慕容普麟害觚及平中山追封謚曰秦愨

王

陳留王虔昭成孫登國初封陳留公後慕容寶來寇
虔戰沒道武追惜傷慟追謚陳留桓王

江夏王呂道武族弟初以軍功封江夏公卒贈王爵
淮陵侯大頭烈帝之曾孫文武初封淮陵侯卒贈高
平公

河間公齊烈帝玄孫大武時贈爵河間公卒贈王爵
樂陵王胡仁景穆子和平四年三月追封樂王

章武王大維景穆子皇興二年薨追贈征北大將軍
章武郡王謚曰敬

河間王若文成帝第七子年十六未封而薨追封河

間王謚曰孝

長鄉縣侯提臨淮王譚子太武孫也孝文時為員外
郎後詔提從駕南伐至雒陽參定遷都之議尋卒以
預參遷都功追長鄉縣侯

提子濟南王昌武時復封臨淮王未拜而薨贈齊州
刺史謚曰康追改封濟南王

都昌伯誘中山王熙弟也熙起兵誅元又為其長史
柳元章等所殺誘被誅後追昌縣開國伯謚曰恭

東安王凝弟湛為廷尉少卿莊帝初遇害河陰賜征

東大將軍青州刺史追封漁陽王

武邑王義興景穆曾孫也初於河陰遇害永安中追封燕郡王尋改封鉅鹿王又改封武邑王

陳留王真孝莊之兄也建義元年六月追封為陳留王

後周邵國惠公號武帝伯武保定元年七月追封郡國公謚曰惠

顥子景公什肥年十五而顥沒後魏永安中大祖入關什肥不能離母遂往晉陽及太祖定秦隴什肥為齊神武所害追贈太冢宰襲封邵公謚曰景

杞簡公連武帝伯父追賊定州戰歿保定元年七月

追封杞公謚曰簡

連子烈公元寶為齊神武所害保定初追贈襲杞國公謚曰烈

莒國莊公洺生亦武帝伯父也保定元年七月追封

莒公謚曰莊

洺子穆公菩薩為齊神武所害保定初追贈大將軍襲爵謚曰穆

宋國公震文帝子也保定元年七月追封

虞國公仲武帝族祖保定元年十二月封

隋河間公元孫高祖從祖也帝受禪以尚書令河門
郡公義成縣公鍾葵高祖族祖帝受禪追贈義成縣
公

蔡王愨高祖弟也周明帝時賜爵陳留郡後從武帝
平齊戰死高祖受禪追封蔡王謚曰景

河間王弘高祖從祖弟也為太子太保薨大業十年
追封郟王

唐鄭王亮高祖從父隋海州刺史武德初追封

畢王章高祖從父任周梁州刺史謀殺隋文事泄被
誅高祖即位追封畢王

郟王禕高祖從父武德初追封

恭王蔚高祖從父武德初追封

西平王安蔚子武德初追封

濟南王哲高祖追謚伯升為齊武公

雍王繪高祖從父武德初追封

河南王贄繪子武德初追封

東平王韶高祖從父武德初追封

梁王澄蜀王湛漢王洪皆高祖兄並早卒武德初追

封

衛王玄霸高祖子早薨武德元年追封謚曰懷

楚王智雲高祖子大業未從高祖於河東及義師將起建成潛歸太原以智雲年小委之而去因爲吏所薄送于長安爲陰世師所害義寧元年追封楚國公武德元年進封王謚曰哀

寧王憲睿宗長子天寶元年十一月制曰能以位讓爲吳太伯存則用成其節歿則當表其名非嘗之稱旌德斯在故太尉寧王憲誕含粹靈允膺大雅孝悌之至本乎中誠仁和之深非繇外獎率繇禮度雅尚文儒謙以自牧樂於爲善北兩獻而有光與二南而念德自出臨方鎮入配台階逾勵忠勤益闡周慎實

謂永爲藩屏以輔邦家曾不愍遺奄爲殂沒友于之痛震動良深惟王朕之元昆合升上嗣以朕奉先朝之睿略定社稷之玷危推而不居請予主鬯又承慈旨焉敢固違不然者則震極之尊豈歸于薄德茂行若此易名是憑自非大號孰副休烈按謚法功推尚德曰讓德性寬柔曰讓敬追謚曰讓皇帝宜令所司備禮冊命冊曰皇帝若曰於戲古者崇德考行猶謚大名歸終追遠亦庶徽冊况乃元昆之戚天倫之重豈循掌典者哉咨爾故太尉寧王憲純粹秉靈冲和成量孝友之性發乎天然仁義之道彰乎日用加以

好賢不倦樂善有聞休問掩於閭平清猷光於魯衛
實謂儀刑邦家保祐藩維景命不融奄從薨逝興言
震動哀疚纏懷惟王地居元子合膺主鬯昔朕上稟
先訓克清群兇遂固守撫謙懇讓儲副然則深仁厚
德茂行已表於生前寶位尊名盛禮寧忘於歿後是
用謚王爲讓皇帝令遣使尚書左丞相耀卿副使大
掌卿韋縉等持節禮冊因心之感備物飾情瞻典策
而哀深想杼華而望絕所冀幽安嘉茲寵榮

中王撫睿宗子開元十二年薨制曰德盛者必享休
名道高者必膺殊典况人倫之重義切因心天爲之
深情殷追遠故司徒申王撫敬哲聰明本乎天性溫
恭孝友挺自生知樂善好書清猷邁於兩獻深仁厚
義美化侔於二南可謂具瞻百察儀刑列辟朕將永
康兆庶方自友于天不憖遺奄從薨遊永惟仁範哀
慟纏懷用表非嘗之榮少寄天倫之戚可追贈惠莊
太子宜令所司備禮就加冊命陪葬橋陵以禮部尚
書蘇頌爲喪葬使京兆尹李休光爲副使尚書左丞
楊承令爲鹵簿使遣侍中攝太尉元乾曜持節冊曰
維開元十二年十一月甲申皇帝若曰於戲夫縟禮
所以飾情崇名所以表德義存追遠愛洽因親惟故

司徒申王馮璿極稟虛邦家維翰體孝友以成性用
 淳和而合道汗獻受易率以鳴謙河間聚書時其好
 學加以出為方伯弘宣六條入登司徒大敷五教而
 天則不愆奄薨於行留邸無期同異遂遠興哀痛震
 動於厥心夫先王演親親之恩春秋著加等之義上
 嗣之位歸終斯在宜率茂典以永徽猷魂而有靈式
 昭哀贈

岐王範睿宗子開元十四年薨陪葬橋陵制曰褒崇
 名器所以尊德也光昭典禮所以歸終也况天倫之
 愛親親之至乎故太子太傅上柱國岐王範特稟聰

明率繇孝友好書不倦樂善無忌固已作則列藩儀
 刑百辟方憑魯衛之政率泥雍穆之風豈徒輔德愆
 期殲良奄及想同氣而莫遂望駉駕而何追言念平
 生情深震動宜加殊禮之命用寄孔懷之哀可追贈
 惠文太子

薛王業睿宗子開元二十一年薨明年冊贈惠宣太
 子
 隋王暕睿宗子也初封汝南郡王早薨唐隆元年
 追贈義豐郡王

光順桂陽郡王守義皆章懷太子賢之子也先天二

年三月太上皇詔追封光順爲莒王守義爲畢子
慶王琮玄宗長子天寶十一載薨贈靖德太子後肅
宗元年建寅月詔曰聖人立號天下至公膺其美者
必歸有德有其德者或無其位苟徽烈可紀則追崇
之典行焉况義貫因心禮優加等稽夫往策抑有前
聞盛業鴻猷久不可替故靖德太子琮慶鍾霄極親
則朕兄性與天道行高時望宣慈惠和聰明睿哲四
科兼綜一以貫之而福壽不遐既隨往運緬惟友愛
實軫于心朕昔踐儲宮顧誠非次於君人之命所不
敢違以少長而言豈忘其序每思懇讓竟莫獲從遽

順聖慈嗣茲寶位安可不申夙志有闕推恩宜加尊
異之名載茂哀榮之典敬用追謚曰奉天皇帝妃
氏曰恭應皇后宜委有司即擇日冊命更以禮葬仍
令右僕射晁充使監護少府竇履信爲副

榮王琬玄宗子天寶十四載薨贈靖恭太子

夏王一玄宗子開元五年孩孺而薨追封夏王謚曰
悼

懷王敏玄宗子纔晬開元八年二月薨封懷王謚曰
哀

建寧郡王倓肅宗第三子天寶中封肅宗至靈武爲

張良娣李輔國所構賜死代宗即位追贈齊王大曆三年五月詔曰故齊王倓承天祿之慶保鴻名之光降志尊賢高才好學藝文博洽智畧宏通斷必知來謀皆先事識無不達理至逾情乃者寇盜橫流鑿與南幸先聖以宸扈之戀將侍君親惟王以宗廟之重誓寧家國克協朕志載符天時立辨群議之非同獻五原之計中興之盛實藉音功景命不融早從厚宥天倫之愛震惕良深流涕追封朕于東海傾加表飾未極哀榮夫以參舊邦再造之勤成天下一家之業而存未峻其等沒未尊其稱非所旌徽烈明至公也

朕以耿身纘膺大寶不及讓王之禮莫由太弟之嗣所懷靡從追想逾切非嘗之命寵錫攸宜敬用追謚曰承天皇帝與興信公主第十四女張氏宜婚謚曰恭順皇后有司准式擇日冊命改葬于順陵仍祔於奉天皇帝廟同殿異室焉
 衛王秘肅宗第四子天寶中封西平郡王早薨寶應元年五月追封
 鄆王榮肅宗第八子天寶中封靈昌郡王早世寶應元年追封鄆王
 恭懿太子倓肅宗第十二子至德二年封與王上元

元年薨詔曰厚禮所以表行况情鍾天屬寵及哀榮
封載疇加等之美式備元儲之贈永懷軫念有惻爰
章第十二子故興王召毓慶濬源汾華若水天資純
孝神假聰明河間聚書幼聞樂善之旨延陵聽樂早
得知音之妙頃以斲嬰沉瘵殆積旬時而資敬益章
穎晤逾爽愛親之戀言不聞於斯頃告訣之詞事先
符於夢寐顧惟至性實切深衷將分土折珪載崇藩
翰聞詩對易爰就琢磨方冀成立未虞天喪瑤英始
茂遽摧於當春隙駟俄遷忽沉於厚夜興言痛悼憫
惜良深宜賁寵於青宮俾哀榮於玄窆可贈太子謚

曰恭懿

召薨時七八歲既薨之久肅宗張后俱夢召有如平昔拜辭流涕而去帝方寵疾追念過

深故特以儲嗣之贈

寵之上疾累日方平

宋王禧肅宗第十四子早世建中二年正月追封

昭靖太子邈代宗第二子寶應元年封鄭王大曆九

年薨帝惜其才早天冊贈昭靖太子

均王遐代宗第二子早天真元八年追封

荆王選代宗第十二子早世建中三年追封

靈溪郡王詠昭靖太子第二子大曆十年七月追封

代王誼德宗第八子本封縉雲郡王早薨建中三年

正月追封

邕王諒宗子德宗命之爲子貞觀四年封十五年九月薨時年十八贈文敬太子

晉王普敬宗長子太和二年詔曰王者重統紀尊儲用所以上嚴國本祇叶禮經睦人倫以正邦典崇丕基而昭彞式其或德契元良恩當追命道雖間於存歿義有表於哀榮仰惟舊章用摠憫志故開府儀同三司晉王普先帝冢嗣間氣夙鍾孝敬發於岐嶷溫仁形於襁褓剪珪分社光祝冊於參墟錫土啓藩假威尊於上黨朕頃戡內難謬屬與能以玉齒在嬰提事絕推讓方期就傳謂致修齡旣因猶子之義俾膺

主鬯之選天不憖遺殲我本枝泣悼永往空餘典禮嗟樂善而莫報顧卜起而何追銜悲良慟此誠無極是用稽諸前訓申我宿愛布曩懷於此日告知在于幽靈式備虛儀曷廖深痛可贈悼懷太子仍令有司擇日備禮追冊

梁永王義方太祖伯父詔王義談太祖叔父開平四年追封

朗王存太祖從兄唐乾符中興太祖俱逐黃巢表中流矢而卒開平四年四月追封

郴王友裕太祖長子唐末爲華州節度使守與德尹

天祐元年卒開平王年追封

密王友倫太祖兄子唐末為宿衛都指揮使遙領容州節度使因會客擊鞠馬逸墜車而薨開平三年追封

安王友寧太祖兄子唐末遙領邕州節度使昭宗自奉鳳翔還降詔書以青冠未殄委之攻討友寧進師逼青州青人悉出大戰于石樓王師少却友寧自峻阜騎馳殿將軍馬蹶仆為敵人所及而薨開平三年追封

晉陳王重果高祖子幼凶天福六年五月追封

福王德高祖弟後唐末為沂州馬步軍都指揮使天福初贈太傅七年正月贈太尉追封

通王殷高祖弟天福初贈太傅七年正月贈太尉追封

廣王威高祖弟後唐末為彰聖后第三軍都指揮使長州刺史天福初贈太傅七年正月贈太尉追封
號王重英高祖子天福二年正月贈太保七年正月贈太傅追封

壽王重文高祖子天福二年權東都留守遇害贈太傅七年正月贈太尉追封

鄭王重裔高祖子天福二年正月贈太保七年正月
贈太傅追封

沂王重鑑高祖子天福二年爲河陽符度使遇害贈
太尉七年正月贈太師追封

叢王重進高祖子天福二年正月贈太保七年正月
贈太傅追封

韓王暉高祖弟爲曹州防禦使以疾終於官歸葬太
原天福八年追封

周鄭王侗杞王信皆太祖子乾祐末遇害廣順元年
二月詔以故弟二子青哥贈太保賜名侗第三子意

哥贈司空賜名信顯德四年四月制曰禮以緣情恩
以悼往矧在友于之列尤鍾惻愴之思故皇帝贈太
保侗贈司空信等玉葉聯芳金莖比瑞屬景運之初
啓何大年之不登未剪桐珪連雕棹萼俾予終鮮寔
動永懷旣登叙以無階在疏封而起恡贈其王爵慰
我天倫侗追封鄭信追封杞王

越王誼吳王誠韓王誠皆世宗子乾祐末遇害廣順
元年二月太祖詔故皇孫三人關贈左驍衛太將軍
賜名誠三哥贈左武衛太將軍賜名誠三哥贈左領
衛大將軍賜名誠顯德四年四月制曰父子之道聖

賢不忌 舜思天閔之端 愈動悲良之抱 故皇子賜左
 驍衛大將軍 誼贈左武衛大將軍 誠贈左屯衛大將
 軍 誠等鳳雛龍翰 聳當其殊姿 王拆蘭摧 早罹於非
 禍 韋惟往事有足傷懷 宜贈一字之封 仍贈三台之
 秩 表吾追念 慰乃英靈 誼追封越王 誠追封吳王 誠
 追封韓王

冊府元龜

